

Ad eundem lacum, & aliud municipium affidet, quod vulgo Lagunam vocant, commerciis cum vicinis provinciis opportunum. Anno 1559 colonos accepit Truxillo, duce *Diego Guarcia de Paredes*.

Huic præfecturæ plus quam 10000 Indi tributum pendunt, iis exclusis, qui decimum octavum annum nondum excefferunt, tum & iis, qui quinquagesimum excefferunt. Vnice enim hoc cavet Indicarum rerum Camera, ne ab his per universum novum orbem tributa exigantur. Accrescente vero ac decrescente hominum indies multitudine, certus tributarium numerus definiri non potest.

Lacus.

Lacus de *Maracaybo* aquas habet dulces, & ab ipsa navium statione in mediterranea loca ad leucas excurrit 40. Latitudinem habet 10 leucarum, ambitum 80, multis passim in ripa insignitus pagis. Vbi terminatur, fluvius in illum definit è novo regno Granatensi ortus, per quem, uti & per lacum ipsum, merces in novam Castellam aliosque tractus devehuntur. In quibusdam hujus lacus partibus nulla circumcirca apparet terræ ripa. Alia in illum exonerantur flumina majora, ipse in mare excurrit, ostiumque habet latitudinis semileucæ, in quo rupes est edita.

Promontoria, insule, fluvii.

Promontoria, portus, cuspides hujus præfecturæ, necnon insulæ jam inde à Maracapanâ sunt; *La Vrchila*, insula è regione fluminis *Oynare* sita, qui piscosissimus est, præter aliam *Roca delos Isleos*: hinc promontorium de *Cordera*, & portus *Flechado*, nec non *Sardinas*, & ex opposito insula de *Aves*: ulterius portus *Burburata*, ubi salinæ sunt, sedesque Hispanorum. At versus interiora sex à mari leucis lacus est *Tocarigua*, dulces aquas sufficiens. Sequitur ad littus *Golfo Triste*, & è regione insula *Bonayre*: porro cuspis *Seca*, & ex adverso insula *Curacao*, ad cuius latus Boreale navibus optima propter maris altitudinem statio est. In hac tanta est pecorum copia, ut ex solis exuviis lucrum quærant indigenæ. Paulo ulterius versus occidentem *Curacaute* jacet, ex opposito cabo *S. Roman*; inde insula *Aruba*. Atque hæc quidem tres insulæ *Curacao*, *Bonayre*, *Aruba*, ab Indis habitatæ sunt qui Christianam amplexi sunt religionem, adeoque ingenio, animique dotibus valent.

Promontorium *S. Roman* 20 leucis in mare excurrit, peninsulæ forma. solum planum, in cuius fere medio mons exurgit, longius à littore spectabilis. Post hoc ostium se pandit sinus *Venezuelæ*, & fluvius *Mitare*, & tres insulæ *los Monges*, quarum una montem habet. Hinc *Cabo de Coquibocoa*, ubi solum stateræ usus ac probandi auri ars observatur. Sequitur *Baja honda* & *del Portete*, & postremo *Cabo de Vela*, altitud. grad. 12, & 18 à fluvio de *la Hacha* leucis.

Decreverant hic loci Germani anno 1536 civitatem ædificare, verum cum deprehendissent

America.

solum omne planum esse, nec ullis montibus adfurgere, aridum, infrugiferumque, fluviorum adhuc expers, nec incolas mayzo vesci, verum sola venatione ac piscatione sibi victum quærere, ac panis loco seminibus herbæ cujusdam agrestis uti, à cæpto destiterunt. Sub ipso tamen promontorio navium statio est commoda fidaque, vado arenoso.

Fluvius de *la Hacha* *Venezuelam* inter & *S. Martham* labitur, in eo nulla deprehenduntur auri vestigia. Regunt urbem prætores subordinati Hispaniolæ; in spiritualibus subditi Episcopatu *S. Marthæ*. Situs est locus mille à mari passibus; in colle humili. Portus Boream versus patet. Solum fertilissimum est, eosdemque quos *Castella* fructus profert. Multas habet tigres, culices: flumina crocodilis scatent. Auro & gemmis preciosis abundat, quæ peculiari facultate, coli, renum, lienis affectus, uti & diarrhæam sanant. Salinas insuper habet.

*Nova Andalusia* *Venezuelæ* contermina est ad ortum: dicitur & *Paria*; vasta regio est, necdum satis cognita, sub qua amplissimum flumen, quod vulgo dicunt *Oronoque*, comprehenditur. In hac provincia jacet *Cumana*, exiguum oppidum, ad finem maris, qui *Arayam* provinciam, dividit. E regione hujus oppidisunt celeberrimæ illæ salinæ, quæ cum multis annis omnibus nationibus, & præsertim nostratibus patuissent, superioribus demum annis à rege Hispaniarum valida arce faucibus illarum apposita, velut occlusæ fuerunt. Porro ad ripam fluminis *Oronoque*, quod quam plurimis alveis in Oceanum evolvitur, ex adverso insulæ *Trinitatis*, unum & invalidum oppidum incolunt Hispani, quod vocant *S. Thomæ*, quod superioribus annis ab Anglis direptum, duci illorum *Waltero Raleigh* fortissimo equiti exitum maturavit. Ab hoc loco magno dispendio & multorum exitio hæcenus frustra Hispani sibi aditum parare conati sunt ad illam tantopere celebratam *Gujanam*, sive *Dorado*. Littori objacent ex adverso insulæ complures, quarum præcipua est *Margarita*, quam primum detexit *Christophorus Columbus* anno 1498. longa est leucas 15, lata 6, amœnissima & virescens ubique, incolis referta, sex septemve à continente leucis. Inter hanc & insulam duæ aliæ interjacent minores insulæ, *Cubagua* & *Coche*. At *Margarita* ab arborum multitudine, pascuis, proventu mayzi, aliisque fructibus commendatur. Duo habet Hispanorum oppida, unum in ipso maris littore prope arcem, in qua residet *Gubernator*, alterum duabus à littore leucis, portum ad Boreale latus commodum satis aperiens. Ad latus orientale syrtes insulæque minores jacent, *Los Testigos* dictæ. Testantur nostri insulam hanc situ esse editiore, & ab utraque parte montosam; interiora vix alendis incolis sufficere. piscatio circa insulam felix est, unde maxime victitant. Multæ hic celoces

*Nova Andalusia.*

O

celoces